

## **ଯାକୁବକ ଲିଖିତ ପତ୍ର ଯାକୁବ୍ ଅଲ୍ଲାକାଦ୍ ଚିଟାଉ ପାରିଟାଏ**

ଯାକୁବ୍ ପୁଅ ଯାକୁବ୍ ନୁତୁମ୍‌ରେ ସାରିୟତାନ୍ ମିଆଁଦ୍ ହଡ଼ ଅଲ୍ଲାକାଦାଏ । ହବାସାକାଅଆଃ ନେ ଯାକୁବ୍ ଯୀଶୁ ଖ୍ରୀଷ୍ଟିଆଃ ହାଗାତେ ତାଇକେନା, ଅକଏଚି ଏନେଟେଦ୍ କାଲିସିୟାରେନ୍ ମିଆଁଦ୍ ଆଗୁଆଇ ଆତଃ ଯୀରୁଶାଲେମ୍ ପାଞ୍ଚେଟ୍‌ରେନ୍ ହଡ଼ ତାଇକେନାଏ ପ୍ରେରିଡ୍ ୧୫:୧୩ । ପ୍ରେରିଡ୍ ପାଉଲୁସ୍‌ହରି ଯାକୁବ୍‌କେ କାଲିସିୟାରେନ୍ ଖୁଣ୍ଟୁ ମେନ୍ତେ କାଜିୟା ଗାଲାତିୟ ୨:୯ ।

ଯାକୁବ୍ ପୁଅ ଯୀଶୁ ଖ୍ରୀଷ୍ଟିଆଃ ଜାନାମ୍‌ରେୟାଃ ୫୦ ବାରାଷ୍ଟ ତାୟମ୍‌ରେ ଅଲ୍ଲାକାନା ମେନ୍ତେ ବାଇବାଲ୍ ପାଣ୍ଡିଡ୍‌କ ବିଶ୍ୱାସ୍ ରିକାଃକ । ଯାକୁବ୍ ଯୀରୁଶାଲେମ୍‌ରେନ୍ ଆଗୁଆଇ ତାଇକେନାଏ, ଏନାତେ ହବାସାକାଅଆଃ ଇନିଃ ଏନ୍ତାଃରେ ତାଇନ୍‌ତାନ୍ ଇମ୍‌ତା ଇନିଃ ନେ ପୁଅ ଅଲ୍ଲାକାଦ୍ ତାଇକେନାଏ ।

ଯାକୁବ୍ ଅତେଦିଶୁମ୍‌ରେ ଛିତିବିତିକାନ୍ ଗେଲ୍‌ବାର୍ କିଲିକିଆଃ ବିଷାଏରେ ଆୟାଃ ପୁଅରେ ଉଦୁବାକାଦା ଯାକୁବ୍ ୧:୧ । ଯାକୁବ୍ ପୁଅରେୟାଃ ଇନିତୁ ସବେନ୍ ଖ୍ରୀଷ୍ଟିୟାନ୍‌କିଆଃ ନାଗେନ୍ତେ ଲାଗାତିଙ୍ଗ୍ ତାନା । ମେନ୍‌ଦ୍ “ଗେଲ୍‌ବାର୍ କିଲିକି” ମେନ୍ତେ କାଜିକାନ୍ କାଜି, ହବାସାକାଅଆଃ ଯାକୁବ୍ ଯିହୁଦୀ ଖ୍ରୀଷ୍ଟିୟାନ୍‌କକେ ଅଲ୍ଲାକାଦ୍‌କଆ । ଚିଆଃଚି ନେ ପୁଅ ପୁରାଃ ପାଢ଼ାଅଃତାନ୍ ହଡ଼କତାଃତେ ସେଟେରେ ନାଗେନ୍ତେ ତାଇକେନା, ନେଆଁରେ ପୁରାଃ ବିଷାଏକ ଅଲ୍ଲାକାନା । ଯାକୁବ୍ ବିଶ୍ୱାସ୍ ଆତଃ କାମିରେୟାଃ ଚେତାନ୍‌ରେ କାଜିକାଦା ଯେ, ସାର୍‌ତି ବିଶ୍ୱାସ୍ କାମିରେ ଉଦୁବଃଆ ୨:୧୭ । ଇନିଃ କିସାଁଶ୍ ହଡ଼କକେ ଏସ୍‌କାର୍ ମାଇନ୍ ଏମାକ ବିଷାଏରେ ଚେତାଅ କାଜି କାଜିକାଦା ୨:୧-୪ । ଆତଃ ଆବୁକେ ଉଦୁବ୍‌ରୁ ତାନା ଯେ, ଆବୁ ଜାଗାର୍‌ତାନ୍ ବିଷାଏରେ ଚିର୍ଗାଲ୍‌କାନ୍‌ରୁ ତାଇନା ୩:୧-୧୨ ।

**ପୁଅ ଭିତାରେ ଅଲ୍ଲାକାନ୍ କାଜି**

- ୧. ଯାକୁବ ଆୟାଃ ପାଢ଼ାଅତାନ୍‌କକେ ଜହାର୍ ମେନ୍ତେ କାଜିକତାନାଏ । ୧:୧
- ୨. ଇନିଃ ଖ୍ରୀଷ୍ଟିୟାନ୍‌କକେ ଦୁକୁ ଇମତା ଧୂରାଜ୍ ସାବକେଦ୍‌ତେ ତାଇନ୍ ନାଗେନ୍ତେ ଜୀଉରେ କେଟେଦ୍ ଏମାକତାନାଏ । ୧:୨-୨୭
- ୩. କାମି ହରାତେ ଚିଲକା ବିଶ୍ୱାସକେ ଉଦୁବ୍ ଲାଗାତିଙ୍ଗ୍‌ୟାଃ ଏନ୍ ବିଷାଏରେ କାଜିକାଦା । ୨:୧-୨୬
- ୪. ବାଚାନ୍ ଚିଲକା ପେଡେୟାନ୍ ହବାଅଥା ଏନା ଇନିଃ କାଜିକାଦାଏ । ୩:୧-୧୨
- ୫. ଯାକୁବ୍ ଅତେଦିଶୁମ୍‌ରେୟାଃ ସେଣାଁ ପାର୍‌ମେଶ୍ୱାର୍‌ଆଃ ସେଣାଁ ଲେକା ନାହାଁଲୀଃ ମେନ୍ତେ କାଜିକାଦା । ୩:୧୩-୪:୧୦
- ୬. ପାଢ଼ାଅତାନ୍ ହଡ଼କକେ ଆପାନ୍‌କେ ମାରାଙ୍ଗ୍ ମେନ୍ତେ ଆଲପେ କାଜିନ୍ ମେନ୍ତେ ଚେତାଅକ ତାନା । ୪:୧୧-୫:୬
- ୭. ତୁଣ୍ଡୁରେ ଯାକୁବ୍ ଚିମିନ୍ ହୁପ୍‌ଡିଙ୍ଗ୍ ଇନିତୁକ୍ ଏମ୍‌କେଦ୍‌ତେ ଆୟାଃ ଅନଲ୍ ଚାବାକେଦାଏ । ୫:୭-୨୦

ଜହାର୍

୧\*ଆଇଙ୍ଗ୍ ଯାକୁବ୍ ପାର୍‌ମେଶ୍ୱାର୍‌ଆଃ ଆଡ଼ଃ ପ୍ରାଭୁ ଯୀଶୁ ଖ୍ରୀଷ୍ଟ୍‌ଆଃ ଦାସି ତାନିଙ୍ଗ୍, ଗଟା ଅତେଦିଶୁମ୍‌ରେ ଛିତିବିତିକାନ୍ ପାର୍‌ମେଶ୍ୱାର୍‌ଆଃ ହଡ଼କକେ ଜହାର୍ କାଜିତାନ୍‌ଲିଃ ନେ ଚିଟାଉ ଅଲେତାନାଇଙ୍ଗ୍ ।

ବିଶ୍ୱାସ୍ ଆଡ଼ଃ ସେଣାଁ

୨ ହେ ଆଇଁୟାଃ ହାଗା ମିଶିକ୍, ଜୀଦାନ୍‌ରେୟାଃ ସେସେନ୍ ହରାରେ ଚିମିନ୍ ରାକାମ୍‌ରେୟାଃ ବିନିଡ଼ାଅ ହିଜୁଃରେଦ୍, ଏନାକେ ରାସ୍‌କାରେୟାଃ ବିଷାଏ ତାନାଃ ମେନ୍ତେ ଆଟ୍‌କାରେପେ । ୩ ଚିୟାଃଟି ଆପେ ସାରିତାନାପେ, ନେ'ଲେକାନ୍ ବିନିଡ଼ାଅ ହିଜୁଃତାନ୍ ଇମତା ବିଶ୍ୱାସ୍‌ରେ କେଟେଦ୍ ତାଇନଃରେ, ଆପେୟାଃ ସାହାତିଙ୍ଗ୍‌ରେୟାଃ ପେଡ଼େଃ ହାରାଇଦିୟଃଆ । ୪ ଆପେ ତୁଣ୍ଡୁ ଜାକେଦ୍ ସାହାତିଙ୍ଗ୍‌କେଦ୍‌ତେପେ ତାଇନଃରେଦ୍, ଜେତାନ୍ ବିଷାଏରେ କା ଜାଞ୍ଜିକେଦ୍‌ତେ ପକ୍‌ତା ଆଡ଼ଃ ପୁରାକେଦ୍‌ତେପେ ତାଇନାଃ । ୫ ମେନ୍‌ଦ୍ ଆପେକଏତେ ଜେତାଏ ସେଣାଁରେ ଜାଞ୍ଜିକାନ୍‌ରେଦ୍,

\* ୧:୧ ୧:୧ ମାଥ୍ରଉ ୧୩:୫୫; ମାର୍କ ୬:୩; ପ୍ରେରିଡ଼ ୧୫:୧୩; ଗାଲତିୟ ୧:୧୯.

ଇନିଃ ପାର୍ମେଶ୍ଵାରତାଃରେ ବିକ୍ରିକା, ଏନାରେ ପାର୍ମେଶ୍ଵାର ଇନିଃକେ ସେଣ୍ଠାଏ ଏମାଇୟା, ଚିୟାଠି ପାର୍ମେଶ୍ଵାରଦ ବେଗାର୍ ହିଚ୍‌କିରାଅକେଦତେ ଆତଃ ଲେବେଃ ମନ୍‌ତେ ସବେନ୍‌କକେ ଏମାଃଏ । <sup>୭</sup> ମେନ୍‌ଦ ଆପେ ବିକ୍ରି ଇମ୍‌ତା, ବେଗାର୍ ଆତଃଉଡ଼ୁକେଦତେ ବିଶ୍ଵାସ୍‌ତାନ୍‌ଲଃ ବିକ୍ରିପେ । ଆତଃଉଡ଼ୁକେଦେ ବିକ୍ରିତାନ୍‌ନିଃ, ହୟତେ କା ଆବର୍‌ଅଃ ଦରେୟାରେୟାଃ ଆଲ୍‌ପୁଙ୍ଗ୍ ଲେକାଃଏ । <sup>୮</sup> ଏନ୍‌ଲେକାନ୍ ହଡ଼ଦ, ପ୍ରାଭୁତାଃଏତେ ଜେତନାଃ ନାମେୟାଃଏ ମେନ୍ତେ ଆଲ୍‌କାଏ ଉଡ଼ୁଗକା, 「 ଚିୟାଠି ଇନିଃଦ ବାରିଆ ମନ୍‌ରେନ୍ ହଡ଼ତାନିଃ, ଏନାତେ ଇନିଃ ଆୟାଃ ଉହାଟ୍‌କାଦତେୟାଃ କାଏ ରିକା ଦାଡ଼ିୟା ।

### କିସାଣ୍ ଆତଃ ଗାରିବ୍

<sup>୯</sup> ଗାରିବ୍ ଖ୍ରୀଷ୍ଟ ବିଶ୍ଵାସୀ ହାଗାକକେ ପାର୍ମେଶ୍ଵାର ଇନ୍‌କୁଆଃ ଜୀଦାନ୍‌ରେ ହାରାଇଦିକ ଇମ୍‌ତା ଇନ୍‌କୁ ରାସ୍‌କାଅଃକାକ, <sup>୧୦</sup> ଆତଃ କିସାଣ୍ ଖ୍ରୀଷ୍ଟ ବିଶ୍ଵାସୀକକେ ପାର୍ମେଶ୍ଵାର ଲାତାରରେ ଉୟୁଃକ ଇମ୍‌ତା ଇନ୍‌କୁ ରାସ୍‌କାଅଃକାକ । ଚିଆଠି ଇନ୍‌କୁଆଃ କିସାଣ୍‌ତେୟାଃ ତାସାଦ୍ ବାହା ଲେକା ନୁରକେନଃଆ । <sup>୧୧</sup> ସିଙ୍ଗି ରାଁପରେୟାଃ ଲଲ ହୟତେ ତାସାଦ୍ ରହଡ଼କଆଃ, ଆତଃ ଏନାରେୟାଃ ବାହା ନୁରକଆଃ ଏନ୍ତେ ଏନାରେୟାଃ ସୁଗାଡ଼ାନ୍‌ତେୟାଃ ଜିୟନ୍‌କଆଃ । ଏନ୍‌ଲେକାଗି, କିସାଣ୍ ହଡ଼ହ୍ ଆୟାଃ ସବେନ୍ କାଜିକାମିରେୟାଃ ଭିଡ଼ରେ ମୁସିଙ୍ଗ୍ ହୁଲାଙ୍ଗ୍ ଜିୟନଃଆଏ ।

### ବିନିତାଅ ଆତଃ ଲାଲାଡ଼

<sup>୧୨</sup> ବିନିତାଅରେ ସାହାତିଙ୍ଗ୍‌ତାନ୍ ହଡ଼କ ସୁକୁତାନ୍‌ଗିୟାକ, ଚିୟାଠି ନେ ଲେକାନ୍ ବିନିତାଅରେ ଜିତାଅଃରେଦ, ପାର୍ମେଶ୍ଵାର ଅକ ଜୀଦାନ୍ ଏମ୍ ନାଗେନ୍ତେ ଆଇଃକକେ ଦୁଲାଡ଼ିତାନ୍ ହଡ଼କକେ ବାନାର୍‌ସା ଏମାକାଦକଆଏ, ଇନ୍‌କୁ ଏନାକେ ମୁକୁର୍ ଲେକାକ ନାମେୟାଃ । <sup>୧୩</sup> ଜେତା ହଡ଼ ବିତାଅରେ ଉୟୁଗଃରେ, “ଆଇଁୟାଃ ନେ ବିତାଅ ପାର୍ମେଶ୍ଵାର ସାଃଏତେ ହିଜୁଆକାନା” ମେନ୍ତେ ଆଲ୍‌କାଏ କାଜିକା, ଚିୟାଠି ପାର୍ମେଶ୍ଵାର ଏଡ଼କାନାଃତେ କାଏ ବିତାଅ ଦାଡ଼ିୟାଆଃ, ଆତଃ ଇନିଃ ଜେତାଏକେ କାଏ ବିତାଅକଆ । <sup>୧୪</sup> ମେନ୍‌ଦ ଜେତା ହଡ଼ ଆୟାଃ ଏଡ଼କାନ୍ ସାନାଙ୍ଗ୍‌ରେ ତାଇନ୍‌କେଦତେ ବିତାଅରେ ଉୟୁଗଃଆ । <sup>୧୫</sup> ଏଡ଼କାନ୍

ସାନାଙ୍କରେୟାଃ ହାମ୍ଭାଲ୍‌ରୋଞ୍ଜାଏତେ ପାପ୍ ସିର୍କାଅଃଆ ଆଡଃ ଏନ୍ ପାପ୍ ପୁରା ହାରାଇଦିକେନଃରେ ଗନଏଃ ହବାଅଃଆ ।

୧୭ ହେ ଦୁଲ୍ଲାଡ଼୍ ହାଗା ମିଶିକ, ଆଲପେ ବେଦାଅଃଆ । ୧୭ ସବେନ୍ ବୁଗିନ୍ ବାର୍ଦାନ୍ ଆଡଃ ସବେନାଃଏତେ ପୁରାଃ ବୁଗିନ୍ ଦାନ୍ ସିର୍ମାରେନ୍ ଆପୁ ପାର୍ମେଶ୍ଵାର୍‌ତାଃଏତେଗି ହିଜୁଃଆ । ଇନିଃ ସିର୍ମାରେ ମାର୍ସାଲେତାନ୍ ସିଜି, ଚାଣ୍ଡୁଃ ଇପିଲ୍‌କକେ ବାବାଇନିଃ ତାନିଃ । ଇନିଃ ଉମ୍ବୁଲ୍ ଲେକା ବାଦଲ୍‌ଆଃନିଃ ନାହାଲିଃ । ୧୮ ଗଗା ଅତେଦିଶ୍ଵମ୍‌ରେ ଆଇଃକ ବାଇୟାକାଦ୍ ଜାତୁକଆଃ ଆଲାରେ ଆବୁ ଜେ'ଲେକା ପାହିଲା ଠାୟାଦ୍‌ରେରୁ ତାଇନା, ଏନାମେନ୍ତେ ଇନିଃ ଆୟାଃ ଇଛାସାନାଙ୍କରେ ସାର୍‌ତି କାଜିତେ ଆବୁକେ ବାଇୟାକାଦ୍‌ବୁଆ ।

### ଆୟୁମ୍ ଆଡଃ କାମିରିକା

୧୯ ଆଇୟାଃ ଦୁଲ୍ଲାଡ଼୍ ହାଗା ମିଶିକ, ନେଆଁ ପାହାମେପେ, ଆପେ ସବେନ୍‌କ ଆୟୁମ୍ ନାଗେନ୍ତେ ଏୟନାକାନ୍‌ପେ, ମେନ୍‌ଦ ସୁଆଏତେ ଜାଗାର୍ ନାଙ୍କ୍ ଆଡଃ ସୁଆଏତେ ଖ୍‌ସ୍‌ଆଃ ନାଗେନ୍ତେ ହବାଅଃଆପେ । ୨୦ ଚିୟାଃଚି ହଡ଼ଆଃ ଖ୍‌ସ୍ ହରାତେ ପାର୍ମେଶ୍ଵାର୍‌ଆଃ ଇଛା ଧାର୍‌ମାନ୍ କାଏ ରିକାଦାଡ଼ିୟା । ୨୧ ଏନାମେନ୍ତେ ସବେନ୍ ଲେକାନ୍ ଏଡ଼କାନ୍ ଗିନିକାନ୍‌ତେୟାଃକ ଆଡଃ ଏଡ଼କାନ୍ ଚାଇଲ୍ ଚାଲାନ୍ କାମିକ ବାଗିପେ । ଆପାନ୍‌କେ ପାର୍ମେଶ୍ଵାର୍‌ତାଃରେ ଜିମାକେଦ୍‌ତେ, ଆପେୟାଃ ମନ୍‌ସୁରୁଦ୍‌ରେ ଇନିଃ ଅକ ବାଚାନ୍ ହେରାକାଦାଏ, ଏନାକେ ତେଲ୍‌ଏପେ । ଏନା ଆପେକେ ବାଞ୍ଚାଅ ଦାଡ଼ିୟାପେୟା ।

୨୨ ଆପେ ଆପାନ୍‌କେ ଆଲପେ ବେଦାନାଃ । ଇନିୟାଃ ବାଚାନ୍ ଏସ୍‌କାର୍ ଆୟୁମ୍‌ଲେରେ କା ହବାଅଃଆ ମେନ୍‌ଦ ଏନ୍ ବାଚାନ୍ ଲେକାତେ କାମି ରିକା ଲାଗାଡ଼ିଙ୍‌ୟାଃ । ୨୩ ଅକ ହଡ଼ ପାର୍ମେଶ୍ଵାର୍‌ଆଃ କାଜି ଏସ୍‌କାର୍ ଆୟୁମାଃଏ, ଚାଏ ଆୟୁମ୍‌କେଦ୍‌ତେ କାଏ କାମିୟାଃ, ଇନିଃ ଆଏନାରେ ଆୟାଃ ମେଦ୍‌ମୁହାଡ଼୍ ନେଲେତାନ୍ ହଡ଼ ଲେକାଃଏ । ୨୪ ଇନିଃଦ୍ ବୁଗିଲେକା ଆୟାଃ ମେଦ୍‌ମୁହାଡ଼୍‌କେ ଆଏନାରେ ନେଲେନା, ମେନ୍‌ଦ ଇନିଃ ଏନ୍ତାଃଏତେ ଅଡ଼ଙ୍‌ୟାନ୍‌ତେ ଆୟାଃ ଆପ୍‌ନାଃ ମେଦ୍‌ମୁହାଡ଼୍‌କେ ଇମ୍‌ତାଗି ରିଡ଼ିଙ୍‌ତାଃ । ୨୫ ମେନ୍‌ଦ୍ ହଡ଼ରାଃ ଜୀଉବାଞ୍ଚାଅ ନାଗେନ୍ତେ ମିଆଁଦ୍ ପୁରା ପକ୍‌ତାକାନ୍ ଆନ୍‌ରୁ ମେନାଃ । ଜେତାଏ ଏନା ଆୟୁମ୍‌କେଦ୍‌ତେ

କାଏ ରିଡ଼ିଙ୍ଗ୍‌ମେଁଆ ଆଡ଼ଃ ଆୟାଃ ନାଗେନ୍ତେ ପୁରା ମନ୍‌ସୁରୁଦ୍‌ରେ ମିଦ୍‌ମନ୍‌ତେ ଏନାକେ ମାନାତିୟେଁରେଦ, ପାର୍‌ମେଶ୍‌ୱାର୍‌ ଇନିୟାଃ ସବେନ୍‌ କାମିରେ ଆଗିଷ୍‌ ଏମାଇୟାଃ ।

୨୭ ଜେତାଏ ଚିନାଃ ଆପାନ୍‌କେ ଧାର୍‌ମାନ୍‌ ମେନ୍ତେ ଆର୍‌କାରେନ୍‌ ତାନା ? ଇନିଃ ଆୟାଃ ଆଲାଙ୍‌କେ ଆବ୍‌ରେ କାଏ ଦହ ଦାଡ଼ିତାନ୍‌ରେଦ, ଇନିୟାଃ ଧାରାମ୍‌ କାମିକ ସବେନାଃ ସାମାତାନାଃ ଆଡ଼ଃ ଇନିଃ ଆପନାଃ ମନ୍‌କେ ବେଦାତାନା । ୨୭ ରୁଆର୍‌ ହନ୍‌କଆଃ ଆଡ଼ଃ ରାଣ୍ଡିକଆଃ ନାରାଦୁରା ଇମ୍‌ତାଙ୍‌ ଯାତ୍‌ନାଅ ଇଦିକେଦ୍‌ତେ, ଅତେଦିଶ୍‌ମ୍‌ରେୟାଃ ଏଡ଼କାନାଃଏତେ ଆପାନ୍‌କେ ବେଗାର୍‌ ଦାଗିକେଦ୍‌ତେ ଦହତେୟାଃଗି, ଆରୁଆଃ ଆପୁ ପାର୍‌ମେଶ୍‌ୱାର୍‌ଆଃ ଆୟାର୍‌ରେ ପୁରାଃ ଫାର୍‌ତିୟାନ୍‌ ଆଡ଼ଃ ସୁଗାଡ଼ାନ୍‌ ଧାର୍‌ମାନ୍‌ କାମି ତାନାଃ ।

## ୨

### ମେଦ୍‌ମୁହାଁଡ୍‌ ନେଲ୍‌ରେୟାଃ କାଜି

୧ ହେ ଆଇୟାଃ ହାଗା ମିଶିକ, ଆରୁଆଃ ମାନାରାଙ୍‌ ପ୍ରାଭୁ ଯାଶୁ ଖ୍ରୀଷ୍ଟାଃରେ ବିଶ୍ୱାସ୍‌କାଦ୍‌ ହରାତେ, ଆପେ ହଡ଼କଆଃ ମେଦ୍‌ମୁହାଁଡ୍‌ ନେଲ୍‌କେଦ୍‌ତେ ଆଲପେ ସୁସାର୍‌କଆ । ୨ ହବାସାକାଅଆଃ, ଆପେୟାଃ ସାମାଜ୍‌ ଅଡ଼ାଃତେ ଜେତାଏ ମିହୁଡ୍‌ ସୋନାରେୟାଃ ମୁଦାମ୍‌ ଆଡ଼ଃ ଗନଙ୍‌ଆଁନ୍‌ ଲିଜାଃ ତୁସିଙ୍‌କେଦ୍‌ତେ ହିଜୁଃରେ ଆଡ଼ଃ ଏଗାଃ ମିହୁଡ୍‌ ହୁମୁ ଲିଜାଃ ଆଡ଼ଃ ଚେଚାଃ ଲିଜାଃ ତୁସିଙ୍‌କେଦ୍‌ତେ ହିଜୁଃ ଇମ୍‌ତା, ୩ ଆପେ ଗନଙ୍‌ଆଁନ୍‌ ଲିଜାଃ ତୁସିଙ୍‌ୟାଁକାନ୍‌ ହଡ଼କେ ପୁରାଃଗି ମାଇନ୍‌କେଦ୍‌ତେ “ନେତାଃ ଦେଲା ନେ ବୁଗିନ୍‌ ଠାୟାଦ୍‌ରେ ଦୁବ୍‌ମେଁ ମେନ୍ତେପେ କାଜିୟା,” ମେନ୍‌ଦ୍‌ ମିଆଁଦ୍‌ ଗାରିବ୍‌ ହଡ଼କେ, “ଜୁ ଏନ୍‌ଠାଃରେ ତିଙ୍‌ଗ୍‌ମେଁ, ଚାଏ ଏନ୍‌ ଅତେ ଲାତାର୍‌ରେ ଦୁବ୍‌ମେଁ” ମେନ୍ତେପେ କାଜିୟା, ୪ ଏନ୍‌ରେଦ୍‌ ଆପେ ଆପେୟାଃ ଆଲାରେ ମାରାଙ୍‌ ହୁଡ଼ିଙ୍‌ରେୟାଃ ଭେଦ୍‌ଭାଦ୍‌ ରିକାଏତାନାପେ ଆଡ଼ଃ ଏଡ଼କାନ୍‌ ଉଡ଼ୁତାନ୍‌ଲଃ ମେଦ୍‌ମୁହାଁଡ୍‌ ନେଲ୍‌କେଦ୍‌ତେପେ ବିଚାର୍‌ତାନା ।

୫ ହେ ଆଇଁୟାଃ ଦୁଲାଡ଼ ହାଗା ମିଶିକ ଆୟୁମେପେ, ପାରମେଶ୍ୱାର୍ ତିନାଃ ନେ ଅତେଦିଶ୍ୱମ୍ରେନ୍ ନାରାଦୁରା ହଡ଼କକେ ବିଶ୍ୱାସରେୟାଃ ଖୁଜ୍ରେ କିସାଁଣାଃ ନାଗେନ୍ତେ ଆଡ଼ଃ ଆଇଃକକେ ଦୁଲାଡ଼ିତାନ୍ ହଡ଼କକେ ଅକ ରାଇଜ୍ ଏମାକ ନାଗେନ୍ତେ ବାନାର୍ସାଏ ଏମାକାଦକଆ, ଏନାରେୟାଃ ଆକ୍ତେୟାର୍ ନାମେ ନାଗେନ୍ତେ କାଏଚି ସାଲାକାଦକଆ ? ୬ ମେନ୍ଦ, ଆପେ ଗାରିବ୍ ହଡ଼କକେ କାପେ ମାଇନକତାନା । ଅକନ୍ ହଡ଼କ ଆପେକେ ସିଗିଦ୍ପେତାନାକ ଆଡ଼ଃ କାଚାଇରିତେ ଆଇଜ୍ ଇଦିପେତାନାକ, ଇନକୁ ଅକଏ ତାନ୍କୁ ? ଇନକୁଗି ଏନ୍ କିସାଁଣ୍ ହଡ଼କ ତାନ୍କୁ । ୭ ଅକ ଯୀଶୁ ଖ୍ରୀଷ୍ଟଆଃ ନୁଡୁମ୍ ଆପେକେ ଏମାକାନା, ଇନକୁ ଏନ୍ ବୁଗିନ୍ ନୁଡୁମ୍ରେୟାଃ ଏଡ଼କାନ୍ କାଜିକ କାଜିୟାଃ ।

୮ “ଆମାଃ ହପରଜାପାଃ ନିଃକେ ଆମାଃ ଲେକାଗି ଦୁଲାଡ଼ିମେ,” ଧାରମ୍ପୁଅରେ ଅଲାକାନ୍ ପାରମେଶ୍ୱାର୍ଆଃ ରାଇଜ୍ରାଃ ନେ ଆନ୍ତୁକେପେ ମାନାଡ଼ିଜ୍ତାନ୍ ରେଦ, ଆପେ ଠାଡକାନ୍ କାମିପେ କାମିତାନା । ୯ ମେନ୍ଦ ଆପେ ହଡ଼ରାଃ ଏୟରଃଡ଼ସିଜ୍ଅଃ ନେଲ୍କେଦ୍ତେ ହଡ଼କକେପେ ମାଇନକ ତାନ୍ରେଦ, ଆପେ ପାପ୍ କାମିତାନାପେ ଆଡ଼ଃ ଆନ୍ତୁ ଲେକାତେ ଆପେ ମିହୁଡ଼୍ ଆନ୍ତୁକେ କା ମାନାଡ଼ିଜ୍ତାନ୍ ହଡ଼ ଲେକାନ୍କ ତାନ୍ପେ । ୧୦ ଜେତାଏ ସବେନ୍ ଆନ୍ତୁକେ ମାନାଡ଼ିଜ୍ ତାନାଏ, ମେନ୍ଦ ମିଆଁଦ୍ ଆନ୍ତୁ ଏସ୍କାର୍ କାଏ ମାନାଡ଼ିଜ୍ ତାନା, ଇନିଃ ସବେନ୍ ଆନ୍ତୁକେ କା ମାନାଡ଼ିଜ୍ତାନ୍ନିଃ ତାନିଃ । ୧୧ ଚିୟାଃଚି, ପାରମେଶ୍ୱାର୍ କାଜିକାଦାଏ, “ଆପାଜିର୍ କାମି ଆଲମାଃ,” ଏନ୍ ପାରମେଶ୍ୱାରଗି ଆଡ଼ଃମିଆଁଦ୍ କାଜିକାଦାଏ, “ହଡ଼ ଗଗଏଃ ଆଲମାଃ ।” ଏନାତେ, ଆମ୍ କାମ୍ ଆପାଜିର୍ ତାନ୍ରେୟଗି, ହଡ଼ ଗଗଏଃ ତାନ୍ରେଦମ୍, ଆମ୍ ମିହୁଡ଼୍ ଆନ୍ତୁ କା ମାନାଡ଼ିଜ୍ନିଃ ତାନ୍ମେ । ୧୨ ରାଡ଼ାଅଃରେୟାଃ କାମି ଏମ୍ ଦାଡ଼ିତାନ୍ ମୁଶାରାଃ ଆନ୍ତୁ ହରାତେ ଆମାଃ ବିଚାର୍ ହବାଅଃଆ, ଏନା ଆମାଃ ଜାଗାର୍ତେ ଆଡ଼ଃ କାମିତେ ଉଦୁବେମେ । ୧୩ ଚିୟାଃଚି ଜେତାଏ ଏଟାଃନିଃକେ କାଏ ଦାୟାଈୟା, ପାରମେଶ୍ୱାର୍ ଇନିଃକେ କାଏ ଦାୟାଈୟା, ମେନ୍ଦ ଅକନ୍କ ଏଟାଃକକେ ଦାୟାକାଦକଆକ, ଇନକୁକେ ପାରମେଶ୍ୱାର୍ ବିଚାର୍ ନେଡାରେ ଦାୟାକଆ ।

## କାମି ବେଗାର ବିଶ୍ୱାସ ଗନଏଃ

୧୪ ହେ ହାଗା ମିଶିକ, ଜେତାଏ ଆଇଁୟାଃ ବିଶ୍ୱାସ ମେନାଃ ମେନ୍ତେ କାଜିତାନା, ମେନ୍ଦ କାମିରେ କାଏ ଉଦୁବେତାନ୍ ରେଦ, ଇନିୟାଃ କାଜିରେ ଜେତାନ୍ ଲାଭ୍ ବାନଃଆ । ତିନାଃ ଏନ୍ ଲେକାନ୍ ବିଶ୍ୱାସ୍ ଜେତାଏକେ ବାଞ୍ଛାଅ ଦାଡ଼ିୟାଃଏତି ? ୧୫ ମେନ୍ଦ ଜେତାଏ ହାଗା ଚାଏ ମିଶିଆଃ ଲିଜାଃ ଆଡ଼ଃ ଜଜମାଃ ବାନଃରେଦ, ୧୬ ଆଡ଼ଃ ଆପେ ଇନିୟାଃ ଲାଗାତିକ୍ତେୟାଃକେ କା ଏମ୍‌କେଦ୍‌ତେ କାଜିୟାପେ, “ପାର୍‌ମେଶ୍ୱାର୍ ଆମ୍‌କେ ଆଶିଷ୍‌ମେକା, ଜମ୍ ନୁଁକେଦ୍‌ତେ ଜୀଉସୁକ୍ତେ ତାଇନ୍‌ମେଁ ।” ୧୭ ବିଶ୍ୱାସ୍‌ହଗି ଠିକ୍ । ଏନ୍‌ଲେକାଗି ବେଗାର୍ କାମିତେ ବିଶ୍ୱାସ୍ ଗଜାକାନା ।

୧୮ ମେନ୍ଦ ଜେତାଏ କାଜି ଦାଡ଼ିୟାଏ, “ମିହୁଡ଼ରାଃ ବିଶ୍ୱାସ୍ ମେନାଃ, ଏଟାଃ ମିହୁଡ଼ରାଃ କାମି ମେନାଃ ।” ମେନ୍ଦ ଆଇଙ୍ଗ୍ କାଜିୟାଇଙ୍ଗ୍, “କାମି ବେଗାର୍ ଆପେୟାଃ ବିଶ୍ୱାସ୍ ଆଇଙ୍ଗ୍‌କେ ଉଦୁବାଇଙ୍ଗ୍‌ପେ ଆଡ଼ଃ ଆଇଙ୍ଗ୍ କାମି ହରାତେ ଆପେକେ ଆଇଁୟାଃ ବିଶ୍ୱାସ୍ ଉଦୁବାପେୟାଇଙ୍ଗ୍ ।” ୧୯ ପାର୍‌ମେଶ୍ୱାର୍ ମିହୁଡ଼ରିୟାଏ ଏନା ଆପେ ବିଶ୍ୱାସ୍‌ତାନାପେ ବୁଗିନ୍ କାଜିତାନାଃ । ବଙ୍ଗାକହଗି ବିଶ୍ୱାସ୍‌କେଦ୍‌ତେ ବରତେ ଆର୍‌ଆରାଝାଃକ । ୨୦ ହେ ଡଣ୍ଡକ, କାମି ବେଗାର୍ ବିଶ୍ୱାସ୍ ସାମାତାନାଃ, ନେଆଁ ତିନାଃ କାପେ ସାରିତାନା ? ୨୧ ଆବୁଆଃ ପୁରଖା ହାଡାମ୍ ଆବ୍ରାହାମ୍, ପାର୍‌ମେଶ୍ୱାର୍‌ଆଃ ନେପେଲ୍‌ରେ ତିଲ୍‌କା ଧାର୍‌ମାନ୍ ହବାୟାନାଏ ? ଇନିଃ ଆୟାଃ ହନ୍ ଇସାକ୍‌କେ ବେଦି ଚେତାନ୍‌ରେ ଦାଣେଁ ରାକାବ୍‌କିୟାଏ ଇମ୍‌ତାଙ୍ଗ୍ ଆୟାଃ କାମି ହରାତେ ଧାର୍‌ମାନ୍ ମେନ୍ତେ କାଜିୟାନା । ୨୨ ଆପେ ତିନାଃ କାପେ ଆର୍‌କାର୍‌ଉରୁମ୍ ଦାଡ଼ିତାନା ? ଆବ୍ରାହାମ୍‌ଆଃ ବିଶ୍ୱାସ୍, କାମିତେ ଉଦୁବ୍‌ୟାନା, କାମି ହରାତେ ଇନିୟାଃ ବିଶ୍ୱାସ୍ ପକ୍‌ତାୟାନା । ୨୩ ନେଆଁ ହରାତେ ଧାରାମ୍‌ପୁଥ୍‌ରେୟାଃ କାଜି ପୁରାୟାନା : “ଆବ୍ରାହାମ୍ ପାର୍‌ମେଶ୍ୱାର୍‌କେ ବିଶ୍ୱାସ୍‌କିୟା ଆଡ଼ଃ ଇନିୟାଃ ବିଶ୍ୱାସ୍ ହରାତେ ପାର୍‌ମେଶ୍ୱାର୍‌ଆଃ ନେପେଲ୍‌ରେ ଇନିଃ ଧାର୍‌ମାନ୍ ମେନ୍ତେ ଲେକାୟାନା ।” ଆଡ଼ଃ ଆବ୍ରାହାମ୍ ପାର୍‌ମେଶ୍ୱାର୍‌ଆଃ ଗାତି ମେନ୍ତେ କାଜିୟାନା । ୨୪ ଏନାତେ, ଆପେ ଆର୍‌କାର୍‌ଉରୁମ୍ ଦାଡ଼ିୟାପେ ଯେ, ହଡ଼ହନ୍ ବିଶ୍ୱାସ୍ ହରାତେ ଏସ୍‌କାର୍ କା ମେନ୍ଦ କାମି ହରାତେ

ଧାର୍ଯ୍ୟାନ୍ ମେନ୍ତେ କାଜିୟାଆ ।

<sup>୨୫</sup> ଏନ୍‌ଲେକାଗି ହଡ଼୍‌ମରେୟାଃ ଏଡ଼କାନ୍ କାମିରେ ତାଇନ୍‌ତାନ୍ କୁଡ଼ି ରାହାବ୍ ହଗି ଆୟାଃ ବୁଗିନ୍ କାମି ହରାତେ ଧାର୍ଯ୍ୟାନ୍ ମେନ୍ତେ କାଜିୟାନ୍ । ଇସ୍ରାଏଲ୍‌ରେନ୍ ଅକନ୍ ହଡ଼କକେ ଉକୁକେଦ୍‌ତେ କୁଲ୍‌କାନ୍ ତାଇକେନା, ଇନ୍‌କୁକେ ଇନିଃ ଉକୁଃ ନାଗେନ୍ତେ ଆଡ଼ଃ ଏଟାଃ ହରାରେ ସେନଃ ନାଜ୍ ଦେଙ୍ଗାକାଦ୍‌କ ତାଇକେନାଏ, ଏନା ପାର୍‌ମେଶ୍ୱାର୍‌ଆଃ ଆୟାର୍‌ରେ ଠାଉକାନ୍ କାମି ତାଇକେନା ।

<sup>୨୬</sup> ଏନାତେ, ଆମ୍ବା ବେଗାର୍ ହଡ଼୍‌ମ ଜେ'ଲେକା ଗଜାକାନା, ଏନ୍‌ଲେକାଗି କାମି ବେଗାର୍ ବିଶ୍ୱାସ୍‌ହଗି ଗଜାକାନା ।

## ୩

### ଆଲାଙ୍ଗ୍‌ରେୟାଃ ଜନ୍‌କା

<sup>୧</sup> ହେ ହାଗା ମିଶିକ, ଆପେକଏତେ ପୁରାଃ ଇନିତୁକ ଆଲପେ ହବାଅଃଆ । ଚିୟାଃଚି ଆପେ ସାରିତାନାପେ ଯେ, ଆଲେ ଲେକାନ୍ ଇନିତୁକ ଏଟାଃକଆଃ ତାଃଏତେ ପୁରାଃଗି ସାଜାଈକ ନାମେୟା । <sup>୨</sup> ଆବୁ ସବେନ୍‌କଦ ଚିମିନ୍‌ସା ଭୁଲ୍ ରିକାଃବୁ । ଜେତାଏ ଆୟାଃ ଜାଗାର୍‌ତାନ୍ ଇମ୍‌ତା କାଏ ଭୁଲ୍‌ଲେତାନ୍ ରେଦ, ଇନିଃ ପକ୍‌ତାକାନ୍ ଆଡ଼ଃ ଆପ୍‌ନାଃ ହଡ଼୍‌ମକେ ପୁରା ଆବର୍କେଦ୍‌ତେ ଦହ ଦାଡ଼ିତାନ୍ ହଡ଼ ତାନିଃ । <sup>୩</sup> ସାଦମ୍‌ଆଃ ହଡ଼୍‌ମକେ ଆବରରେ ଦହ ନାଗେନ୍ତେ ଆବୁ ଆୟାଃ ମଚାରେ ଲାଗମ୍ ତଲ୍‌ଃବୁ ଆଡ଼ଃ ଆବୁ ଇନିଃକେ ଆବୁଆଃ ଇଛାସାନାଜ୍ ଲେକାତେ ଇଦି ଦାଡ଼ିୟାଃବୁ । <sup>୪</sup> ମିଆଁଦ୍ ମାରାଙ୍ଗ୍ ଦାଆଃ ଜାହାଜ୍ ବିଷାଏରେ ଉଡ଼ୁଈପେ, ଦାଆଃ ଜାହାଜ୍‌କେ ଚାଲାଅତାନ୍‌ନିଃ ପୁରାଃ ହୟ ହିଜୁଃତାନ୍‌ରେୟ ଲିଆଁଦ୍ ହୁଡ଼ିଙ୍ଗ୍ ପାତ୍‌ଝାର୍‌ରେୟାଃ ଦେଙ୍ଗାତେ ଏନାକେ ଆବରରେ ଦହକେଦ୍‌ତେ ଆପ୍‌ନାଃ ଇଛାସାନାଜ୍ ଲେକାତେ ଚାଲାଅ ଇଦିୟାଏ । <sup>୫</sup> ଏନ୍‌ଲେକାଗି ନେ ଆଲାଙ୍ଗ୍‌ହ ହୁଡ଼ିଙ୍ଗ୍‌ଆ, ଏନ୍‌ରେୟ ମାପ୍‌ରାଙ୍ଗ୍ କାଜି କାଜିକେଦ୍‌ତେ ଆପାନ୍‌କେ ମାରାଙ୍ଗ୍ ମେନ୍ତେ କାଜିନାଃ ।

ଉଡ଼ୁ ଲେକାପେ ଚିଲ୍‌କା ସେଙ୍ଗେଲ୍ ଆଙ୍ଗରା ହୁଡ଼ିଙ୍ଗ୍‌ରେୟଗି ମାରାଙ୍ଗ୍ ବିରକେ ଅଣ୍ଡୁରତାଃଏ । <sup>୬</sup> ମଚାରେୟାଃ ଆଲାଙ୍ଗ୍ ସେଙ୍ଗେଲ୍ ଲେକ୍‌ନାଃ ତାନାଃ, ଆବୁଆଃ ହଡ଼୍‌ମରେୟାଃ ହିସାରେ ଅତେଦିଶ୍ୱମ୍‌ରେୟାଃ ସବେନ୍ ଏଡ଼କାନ୍‌ରେୟାଃ ଏନେଟେଦ୍



ଲେକନାଃ ତାନାଃ । ଏନା ଆବୁଆଃ ହଡ଼ମ୍ରେ ତାଇନ୍ତାନ୍ ହରାତେ ହସଡ଼ କାଜିକ ନିତିରୟାନ୍ଲଃ ଆବୁଆଃ ପୁରା ହଡ଼ମ୍ରେ ସଡ଼ରାକାଦା । ଆଲାଙ୍ଗ୍ରେୟାଃ ନାରାକ୍ ସେଙ୍ଗେଲ୍ରେ ଆବୁଆଃ ଗଟା ଜୀଦାନ୍କେ ଅଣ୍ଡୁରତାଃଏ ।<sup>୭</sup> ମାନଝା ସବେନ୍ ବିର୍ ଜାଁତୁକକେ, ତେଣ୍, ରେଙ୍ଗାଅଜାଁତୁ ଆଡ଼ଃ ଦାଆଃରେ ତାଇନ୍ତାନ୍ ଜାଁତୁକକେ ଆପ୍ନାଃ ଆକ୍ତେୟାର୍ରେ ଦହକାଦକଆ । ି ମେନ୍ଦ୍ ଜେତାଏ ତିଉଲାହ ଆଲାଙ୍ଗ୍ରେ ଆବର୍ରେ ଦହ କାକ ଦାଡ଼ିୟା । ଏନା ହସଡ଼ତେ ଆଡ଼ଃ ଗନଏଃରାଃ ମାହୁଁରାତେ ପେରେଜାକାନା ।<sup>୮</sup> ଆବୁ ଆଲାଙ୍ଗ୍ ହରାତେ ପ୍ରାଭୁ ଆଡ଼ଃ ଆପୁ ପାର୍ମେଶ୍ଵାର୍ରେ ଧାନାବାଦ୍ ଏମାଃରୁ । ଆଡ଼ଃ ଏନ୍ ଆଲାଙ୍ଗ୍ ହରାତେ ପାର୍ମେଶ୍ଵାର୍ଆଃ ସଭାବ୍ ଲେକାଗି ବାଇୟାକାନ ହଡ଼କକେ ସାର୍ପାଅକ ତାନାରୁ ।<sup>୧୦</sup> ଏନ୍ ମଟା ହରାତେଗି ଧାନାବାଦ୍ ଆଡ଼ଃ ସାର୍ପାଅ ଅଡ଼ଙ୍ଗ୍ଆଡ଼ତାନା । ହେ ହାଗା ମିଶିକ, ଏନ୍ଲେକା ଆଲକା ହବାଅଃକା ।<sup>୧୧</sup> ମିଆଁଦ୍ ସେତେଙ୍ଗ୍ଏତେ ହେଡ଼େମ୍ ଆଡ଼ଃ ମେହେର୍ ଦାଆଃ ଲିଙ୍ଗି ଦାଡ଼ିୟଃଆତି ?<sup>୧୨</sup> ହାଗା ମିଶିକ, ଲଆଦାରୁଏତେ ଚିନାଃ ଜାଇତୁନ୍ ଜ ଜ'ଆ ? ଚାଏ ଦାଖ୍ନାଡ଼ିଏତେ ଚିନାଃ ଲଆ ଜ ଜ'ଆ ? ଏନ୍ଲେକାଗି ବୁଲୁଙ୍ଗ୍ ଦାଆଃ ଲିଙ୍ଗିୟଃତାନ୍ ସେତେଙ୍ଗ୍ଏତେ ହେଡ଼େମ୍ ଦାଆଃ କା ଲିଙ୍ଗିୟଃଆ ।

### ସିର୍ମାଏତେ ହିଜୁଃତାନ୍ ସେଣ୍

<sup>୧୩</sup> ଆପେକଏତେ ସେଣ୍ନିନ୍ନିଃ ଚାଏ ଆବ୍କାର୍ଉରୁମ୍ନିଃ ଅକଏ ମେନାଇୟା ? ଇନିଃ ସେଣ୍ନିନ୍ତେ ଆଡ଼ଃ ଲେବେଃତେ ବୁଗିନ୍ କାମି ରିକାକେଦ୍ତେ ଆୟାଃ ଜୀଦାନ୍ରେ ଉଦୁବେକାଏ ।<sup>୧୪</sup> ମେନ୍ଦ୍ ଆପେୟାଃ ମନ୍ସୁରୁଦ୍ରେ ହିସ୍ଜା, ମେହେର୍ ଆଡ଼ଃ ଆପ୍ନାଃ ନାଙ୍ଗ୍ ଏସ୍କାର୍ ଉଡ଼୍ଠୁତେ ପେରେଜାକାନ୍ ରେଦ୍, ଆପ୍ନାଃ ସେଣ୍ନିନ୍ ହରାତେ ସାନାର୍ତିରାଃ ବିରୁଧ୍ରେ ଆପାନ୍କେ ମାରାଙ୍ଗ୍ ମେନ୍ତେ ଆଲପେ କାଜିନ୍ ଆଡ଼ଃ ହସଡ଼ କାଜି ଆଲପେ କାଜିୟା ।<sup>୧୫</sup> ନେ'ଲେକାନ୍ ସେଣ୍ ପାର୍ମେଶ୍ଵାର୍ତାଃଏତେ କା ହିଜୁଃଆ, ମେନ୍ଦ୍ ନେ ସେଣ୍ ଅତେଦିଶ୍ଵମ୍ଏତେ ହିଜୁଃଆ । ନେଆଁ ଆମ୍ଏତେ କାହା ମେନ୍ଦ୍ ସାଏତାନ୍ତାଃଏତେ ହିଜୁଃଆ ।<sup>୧୬</sup> ଚିୟାଃତି ଅକ୍ତାଃରେ ହିସ୍ଜା, ଆପ୍ନାଃ ନାଙ୍ଗ୍ ଏସ୍କାର୍ ଉଡ଼୍ଠୁ ମେନାଃ, ଏନ୍ତାଃରେ ବିନ୍ଗାଅ, ଆଡ଼ଃ ସବେନ୍ ଲେକାନ୍ ଏଡ଼କାନ୍ କାଜିକ ତାଇନାଃ

। ୧୭ ମେନ୍ଦ ସିର୍ମାଏତେ ଆଡ଼ଗୁଣତାନ୍ ସେଣାଁ ସବେନାଃଏତେ ସିଦାତେଦ ଫାରିତି, ସୁକୁ ଏମଃ, ଲେବେଷମନ୍, ଆଡ଼ଃ ଗାତିସାଙ୍ଗାତି ତାନାଃ, ଏନା ଦାୟାତେ ପେରେଜାକାନା ଆଡ଼ଃ ପୁରାଃଗି ବୁଗିନ୍ କାମିରେୟାଃ ଜ'ତେ ପେରେଜାକାନା । ନେଆଁ ସାର୍ତିତେ ଆଡ଼ଃ ବେଗାର୍ ଆଡ଼ଃଉଡ଼ଃତେ ହବାଅଃତାନା । ୧୮ ଜାଉସୁକୁ ବାବାଇ ହଡ଼କ ହରାତେ ହେରାକାନ୍ ହିତାଏତେ ଧାର୍ମାନ୍ରେୟାଃ ଜ' ଏମାଃଏ ।

## ୪

### ଅତେଦିଶୁମ୍ଲଃ ଗାତିସାଙ୍ଗାତି

୧ ଆପେ ଆଲାରେ ଲାଡ଼ାଇ ଆଡ଼ଃ ଏପେଗେର୍ ଚିନାଃମେନ୍ତେ ହବାଅଃତାନା ? ଆପେରେ ତାଇନ୍ତାନ୍ ରିଜରାଙ୍ଗ୍ରେୟାଃ ସାନାଙ୍ଗାତି ଏନ୍ ଲେକାଏ ରିକାଏତାନା । ୨ ଚିୟାଃତି ଆପେ ଅକଆଃ ନାମ ନାଗେନ୍ତେପେ ସାନାଙ୍ଗାତାନା, ଏନା କାପେ ନାମେରେ ମାଆଃ ଗଗଏଃ ନାଗେନ୍ତେପେ ସେକାଡେନ୍ ତାନା । ଅକନାଃ ନାମେ ନାଗେନ୍ତେ ଆପେୟାଃ ପୁରାଃଗି ସାନାଙ୍ଗ୍ ହବାଅଃଆ, ଏନା କାପେ ନାମଲେରେ ଏପେଗେର୍ ଆଡ଼ଃ ଲାଡ଼ାଇୟାଃପେ । ଚିୟାଃତି ଆପେ ପାର୍ମେଶ୍ୱାର୍‌କେ ଆପେୟାଃ ଲାଗାତିଙ୍ଗ୍‌ତେୟାଃକ କାପେ ଆସିୟାଃ, ଏନାମେନ୍ତେ ଆପେ ଏନ୍ ସବେନାଃ କାପେ ନାମାଃ । ୩ ଆଡ଼ଃ ଆପେ ଆସିରେୟାଃ କାପେ ନାମେରେୟାଃ ବିଷାଏ ହବାଅଃତାନା, ଆପେୟାଃ ଆସିରେୟାଃ ଉଦ୍‌କେଶ୍ ଏଡ଼କାନାଃ ତାନାଃ । ଆପେ ଆପେୟାଃ ରିଜରାଙ୍ଗ୍ ନାଗେନ୍ତେ ଆସିୟାଃପେ । ୪ ଏ ଆପାଙ୍ଗିର୍ କାମିତାନ୍ କୁଡ଼ି ଲେକାନ୍ ହଡ଼କ, ଅତେଦିଶୁମ୍ଲରେୟାଃ ଗାତିସାଙ୍ଗାତି ପାର୍ମେଶ୍ୱାର୍‌ଆଃ ବାଇରି ତାନାଃ, ଏନା ଚିନାଃ ଆପେ କାପେ ସାରିତାନା ? ଜେତାଏ ନେ ଅତେଦିଶୁମ୍ଲଃ ଗାତିସାଙ୍ଗାତି ରିକାଃଏ ଇନିଃ ପାର୍ମେଶ୍ୱାର୍‌ଆଃ ବାଇରି ତାନିଃ । ୫ ଆପେ ଚିନାଃ ଧାରାମ୍‌ପୁଅରେୟାଃ ନେ କାଜିରେ ସାର୍ତି ବାନଃଆ ମେନ୍ତେପେ ଆର୍‌କାରେତାନା, “ପାର୍ମେଶ୍ୱାର୍ ଆବୁତାଃରେ ଅକ ଆମ୍‌କେ ତାଇନଃ ନାଗେନ୍ତେ ଏମ୍‌କିୟା, ଇନିଃ ଆବୁକେ ପୁରା ଆକ୍‌ତେୟାଃବୁ ନାଗେନ୍ତେ ପୁରାଃଗି ସାନାଙ୍ଗାତାନା ?” ୬ ମେନ୍ଦ ପାର୍ମେଶ୍ୱାର୍ ଅକ ସାୟାଦ୍ ଏମାଃ, ଏନା ପୁରାଃଗି ପେଡେୟାନ୍‌ଗିୟା । ଧାରାମ୍‌ପୁଅରେ

ଅଲ୍ଲାକାନା, “ପାର୍ମେଶ୍ଵର ହିସିଙ୍ଗାତାନକଆଃ କାଜିକଟଙ୍ଗ୍ ରିକାଃଏ ମେନ୍ଦ ଲେବେଃମନ୍ଦ ହଡକକେ ସାୟାଦ୍ ଏମାଃଏ ।”

<sup>୭</sup> ଏନାତେ, ଆପେ ପାର୍ମେଶ୍ଵରତାଃରେ ଆପାନ୍‌କେ ଜିମାନ୍‌ପେ । ସାଏତାନ୍‌କେ କାଜିକଟଙ୍ଗ୍ ରିକାଲପେ । ଏନ୍‌ରେଦ ଇନିଃ ଆପେତାଃଏତେ ନିରାଃଏ । <sup>୮</sup> ପାର୍ମେଶ୍ଵରଆଃ ହେପାଦ୍‌ତେ ହିଜୁଃପେ, ଏନାରେ ଇନିଃ ଆପେୟାଃ ହେପାଦ୍‌ତେ ହିଜୁଃଆ । ଏ ପାପି ହଡକ, ଆପେୟାଃ ତିଃଇକେ ଆବୁଙ୍‌ୟେଁପେ ଆତଃ ଏ ବାରିୟା ମନ୍‌ରେନ୍ ହଡକ, ଆପେୟାଃ ମନ୍‌ସୁରୁଦ୍‌କେ ଫାର୍‌ତିପେ । <sup>୯</sup> ଏୟମ୍‌ତାନ୍, ଦୁକୁଃତାନ୍‌ଲଃ ରାଆଃଏପେ, ଆପେୟାଃ ଲାୟା ରାନାଃରେ ଆତଃ ଆପେୟାଃ ରାସ୍‌କା ଦୁକୁରେ ବାଦ୍‌ଲାଅଃକା । <sup>୧୦</sup> ପ୍ରାଭୁଆଃ ଆୟାର୍‌ରେ ଆପେ ଆପାନ୍‌କେ ଲେବେୟେନ୍‌ପେ, ଏନାରେ ଇନିଃ ଆପେକେ ମାରାଙ୍‌ପେୟା ।

### ମିହୁଡ୍ ଆତଃମିହୁଡ୍‌କେ ଆଲପେ ବିଚାରାଃ

<sup>୧୧</sup> ହେ ଦୁଲାଡ୍, ହାଗା ମିଶିକ, ମିହୁଡ୍ ଆତଃମିହୁଡ୍‌ଆଃ ବିରୁଧ୍‌ରେ ଏଡକାନ୍ କାଜି ଆଲପେୟାଃ । ଜେତାଏ ବିଶ୍ଵାସୀ ହାଗାରାଃ ବିଚାରକେଦ୍‌ତେ ଇନିୟାଃ ବିରୁଧ୍‌ରେ ଏଡକାନ୍ କାଜି କାଜିରେଦ, ଇନିଃ ଆନ୍‌ରୁରେୟାଃ ବିଚାର୍ ଆତଃ ଏନାରେୟାଃ ବିରୁଧ୍‌ରେ ଏଡକାନ୍ କାଜି କାଜିୟା । ଆପେ ଆନ୍‌ରୁରେୟାଃ ବିଚାର୍ ରିକାଏରେଦ, ଆପେ ଏନା କାପେ ମାନାତିଙ୍ଗ୍‌ତାନା, ମେନ୍ଦ ଏନାରେୟାଃ ବିଚାର୍‌ନିଃପେ ହବାକାନା । <sup>୧୨</sup> ପାର୍ମେଶ୍ଵର୍ ଏସ୍‌କାର୍ ଆନ୍‌ରୁ ଏମଃନିଃ ଆତଃ ବିଚାର୍‌ନିଃ ତାନିଃ । ଇନିଃ ଏସ୍‌କାର୍ ବାଞ୍ଚାଅ ଆତଃ ଜିୟନ୍ ଦାଡ୍‌ନିଃ ତାନିଃ । ଏନାମେନ୍ତେ ହପର୍‌ଜାପାଃରେନ୍‌କଆଃ ଗୁଣ୍ଟାଁ ବିଚାର୍ ନାଗେନ୍ତେ ଆପେ ଅକଏ ତାନ୍‌ପେ ?

### ଆପାନ୍‌କେ ମାରାଙ୍ ମେନ୍ତେ କାଜିନ୍ ବିଷାଏରେ ତେତାଅ

<sup>୧୩</sup> ନାହାଁଃଦ ଆୟୁମେପେ, ଆପେକଏତେ ଚିମିନ୍‌ହଡକ କାଜିୟାଃପେ, “ଆଲେ ତିସିଙ୍ଗ୍ ଚାଏ ଗାପା ଏନ୍ ନାଗାର୍‌ତେ ସେନାଲେ, ଆତଃ ଏନ୍ତାଃରେ ମିଦ୍ ବାରାଷ୍ ତାଇନାଲେ ଏନ୍ତେ କାମିଉଦାମକେଦ୍‌ତେ ପୁରାଃଗି ଚାକା ପାଏସାଲେ ନାମ୍‌ୟା ।” <sup>୧୪</sup> ମେନ୍ଦ ଗାପା ଆପେୟାଃ ଜୀଦାନ୍‌ରେ ଚିନାଃ ହବାଅଃଆ,

ଏନାଦ ଆପେ କାପେ ସାରିୟା ! ଆପେୟାଃ ଜୀଦାନଦ କୁହୁଡ଼ି  
ଲେକା, ଘାଡ଼ିକାଦଗି ନେଲଃଆ ଏନ୍ତେ ଆତଃକାଟିଃ ଘାଡ଼ିକାଦରେ  
କା ନେଲଃଆ । <sup>୧୫</sup> ଏନାମେନ୍ତେ ଆପେକେ ନେ'ଲେକା କାଜି  
ଲାଗାଡ଼ିଙ୍ଗୟାଃ, “ପ୍ରାଭୁଆଃ ସାନାଙ୍ଗ ହବାଅଃରେଦ, ଆଲେ ଜାନିଦ୍  
ତାଇନକେଦତେ ନେଆଁଲେ ରିକାୟା ଚାଏ ଏନାଲେ ରିକାୟା ।”  
<sup>୧୬</sup> ମେନଦ ନାହାଁଃ ଆପେ ଆପ୍ନାଃ ମାନାରାଙ୍ଗ ରିକାକେଦତେ  
ଆପାନକେ ମାରାଙ୍ଗ ମେନ୍ତେପେ କାଜିନତାନା; ନେ'ଲେକାନ  
ମାରାଙ୍ଗୟେନ୍ତେୟାଃ ଏଡକାନାଃ ତାନାଃ ।

<sup>୧୭</sup> ଏନାମେନ୍ତେ, ଜେତା ହଡ ବୁଗିନ୍ କାମି ରିକା ଲାଗାଡ଼ିଙ୍ଗୟାଃ  
ମେନ୍ତେ ସାରିକାଦରେୟ ଏନା କାଏ ରିକାଏ ରେଦ, ଇନିଃ ପାପ  
କାମିତାନାଏ ।



### କିସାଁଣ୍ ହଡକ ନାଗେନ୍ତେ ଚେତାଅରେୟାଃ କାଜି

<sup>୧</sup> ହେ କିସାଁଣ୍ ହଡକ ଆଇୟାଃ କାଜି ଆୟୁମେପେ, ଆପେୟାଃ  
ନାଗେନ୍ତେ ହିଜୁଃତାନ ବରଞ୍ଜାନ ଦୁକୁ ହବାଅଃରେଦ ସେନ୍ତାନା,  
ଏନାମେନ୍ତେ ରାଆଃଏପେ ଆତଃ ଏୟମେପେ । <sup>୨</sup> ଆପେୟାଃ  
ଖୁଜ୍ କ ଜିୟନଃଆ ଆତଃ ଲିଜାଃକକେ ନିଦିରକ ଜମେୟା ।  
<sup>୩</sup> ଆପେୟାଃ ସୋନା ରୁପାକରେ ମୁର୍ଚା ସାବକେଦାକ, ଆତଃ ଏନ୍ ମୁର୍ଚା  
ଆପେୟାଃ ବିରୁଧରେ ଗାଞ୍ଜାଏ ଏମେୟା ଆତଃ ଆପେୟାଃ ହଡ଼ମକେ  
ସେଙ୍ଗେଲ୍ ଲେକା ଜୁଲ୍ ଅଣ୍ଡରେଆଏ । ନେ ତୁଣ୍ଡୁ ଦ୍ରିପିଲିରେ ଆପେ  
ଖୁଜ୍ କପେ ହୁଣ୍ଡିଆକାଦା । <sup>୪</sup> ଆପେୟାଃ ପିଡ଼ିରେ କାମିତାନକକେ  
ନାଲା କାପେ ଏମାକାଦକଆ । ଇନ୍କୁଆଃ କାଜିଗହାର୍ ଆୟୁମେପେ  
। ବାବା ଇରଃକଆଃ ରାନାଃ ସବେନାଃଏତେ ପେଡ଼େୟାନ୍ ପ୍ରାଭୁ  
ପାରମେଶ୍ୱାର୍ ଆୟୁମାକାଦାଏ । <sup>୫</sup> ନେ ଅତେଦିଶୁମରେ ଆପେୟାଃ  
ଜୀଦାନ ରିଜରାଙ୍ଗରେ ପେରେଜାକାନା । ଗନଏଃରେୟାଃ ହୁଲାଙ୍ଗ  
ନାଗେନ୍ତେ ଆପେ ଆପେୟାଃ ମନ୍ସୁରୁଦକେ ମଟାକାଦାପେ । <sup>୬</sup> ଆପେ  
ଧାରମାନ ହଡକକେ ଚିଟାକେଦତେ ମାଆଃଗଏଃ କାଦକଆପେ;  
ଇନ୍କୁ ଆପେୟାଃ କାଜିକଟଙ୍ଗ କାକ ରିକା ଦାଡ଼ିୟା ।

☆ ୫:୭ ୫:୭ ମାଥ୍ ୭:୧୯.

### ଧୂରାଜ୍ ସାବକେଦ୍‌ତେ ବିକ୍ରିପେ

<sup>୭</sup> ହେ ହାଗା ମିଶିକ, ପ୍ରାଭୁଆଃ ଆଡ଼ଃମିସା ହିନ୍ଦୁଃ ଜାକେଦ୍ ଧୂରାଜ୍ ସାବକେଦ୍‌ତେ ତାଇନ୍‌ପେ । ନେଲେପେ, ଚାଷିହଡ଼ ଚିଲ୍‌କା ଆୟାଃ ଅତେରେ ପୁରାଃ ଗନଙ୍‌ଆନ୍ ଜ ନାମେ ନାଙ୍ ଧୂରାଜ୍ ସାବକେଦ୍‌ତେ ଗାମାଦାଆଃକେକ ତାଙ୍‌ଆ । <sup>୮</sup> ଏନ୍‌ଲେକାଗି ଆପେୟ ଧୂରାଜ୍ ସାବକେଦ୍‌ତେ ଆପେୟାଃ ମନ୍‌ସୁରୁଦ୍‌କେ ସାଲ୍‌ସାନ୍ତ୍, ରିକାଏପେ । ଆପେୟାଃ ଆସ୍ତା କେଟେଦ୍‌ଗି ତାଇନ୍‌କା, ଚିଆଃଚି ପ୍ରାଭୁଆଃ ହିନ୍ଦୁଃ ହୁଲ୍‌ଙ୍ ନାଡ଼େଜାକାନା ।

<sup>୯</sup> ହେ ହାଗା ମିଶିକ, ମିହୁଡ଼୍ ଆଡ଼ଃମିହୁଡ଼୍‌ନିୟାଃ ବିରୁଧ୍‌ରେ ଆଲପେ କାଜିୟା, ଏନାରେ ପାର୍‌ମେଶ୍‌ବର ଆପେୟାଃ ବିଚାର୍ କାଏ ରିକାଏୟା । ନେଲେପେ, ମାରାଙ୍ ବିଚାର୍‌ନିଃ ଦୁଆର୍ ହେପାଦ୍‌ରେ ତିଙ୍‌ଆକାନା । <sup>୧୦</sup> ହେ ହାଗା ମିଶିକ, ଅକ ନାବୀକ ପ୍ରାଭୁଆଃ ନୁଡ଼୍‌ମତେ କାଜିକାଦ୍ ତାଇକେନାକ, ଇନ୍‌କୁକେ ଧୂରାଜ୍ ଆଡ଼ଃ ସାସାତି ନାମେକେଦ୍‌ରେୟାଃ ନାମୁନା ଲେକା ତେଲ୍‌କପେ । <sup>୧୧</sup> ଇନ୍‌କୁଆଃ ସାହାତିଙ୍ ଜୀଝାନ୍ ହରାତେ ଆବୁ ଇନ୍‌କୁକେ ଧାଇନ୍ ମେନ୍‌ଡେବୁ କାଜିତାନା । ଆପେ ଆୟୁବ୍‌ରାଃ ସାହାତିଙ୍ ଜୀଝାନ୍ ବିଷାଏରେ ଆୟୁମାକାଦାପେ ଆଡ଼ଃ ଟୁଣ୍‌ରେ ପ୍ରାଭୁ ଚିଲ୍‌କା ଇନିଃକେ ଆଶିଷ୍ ଏମ୍‌କିୟାଏ, ଏନା ସାରିତାନାପେ । ଚିୟାଃଚି ପ୍ରାଭୁଦ୍ ପୁରା ଲିବୁଇତେ ଆଡ଼ଃ ଦାୟାତେ ପେରେଜାକାନ୍‌ନିଃ ତାନିଃ ।

<sup>୧୨</sup> ହେ ହାଗା ମିଶିକ, କିରିୟାଏ ଇମ୍‌ତା ସିମ୍‌ା ଦିଶ୍‌ମରେୟାଃ ଚାଏ ଅତେରେୟାଃ ଚାଏ ଏଟାଃ ଜେତାନ୍ ବିଷାଏରେ କିରିୟା ଆଲପେ ରିକାଏ । ଆପେୟାଃ “ହ୍” ମେନ୍‌ତେୟାଃ ହ୍ ତାଇନ୍‌କା ଆଡ଼ଃ “ବାନଃ” ମେନ୍‌ତେୟାଃ ବାନଃ ତାଇନ୍‌କା । ଏନ୍‌ରେଦ୍ ପାର୍‌ମେଶ୍‌ବର ଆଃ ବିଚାର୍‌ରେ ସାଜାକ କାପେ ନାମେୟା ।

<sup>୧୩</sup> ଆପେକଏତେ ଜେତାଏ ଚିନାଃ ନାରାଦୁରାଗିୟାଏ ? ଇନିଃ ବିକ୍ରିକାଏ । ଜେତାଏ ଚିନାଃ ରାସକାଗିୟାଏ ? ଇନିଃ ମାନାରାଙ୍‌ରେୟାଃ ଦୁରାଙ୍‌କାଏ । <sup>୧୪</sup> ଆପେକଏତେ ଜେତାଏ ଚିନାଃ ଦୁକୁତାନାଏ ? ଇନିଃ କାଲିସିୟାରେନ୍ ପ୍ରାଚିନ୍‌କକେ କେଡ଼ାକକାଏ; ଇନ୍‌କୁ ପ୍ରାଭୁଆଃ ନୁଡ଼୍‌ମତେ ସୁନ୍‌ମ୍ ଗସଃକେଦ୍‌ତେ

☆ ୫:୧୨ ୫:୧୨ ମାଥୁଇ ୫:୩୪-୩୭.

☆ ୫:୧୪ ୫:୧୪ ମାର୍କ ୬:୧୩.

ଆୟାଃ ନାଗେନ୍ତେ ବିକ୍ରିକାକ । ୧୫ ନେ'ଲେକାନ୍ ବିଶ୍ୱାସ୍ରେୟାଃ  
 ବିକ୍ରି ଦୁକୁତାନ୍ନିଃକେ ବୁଗିୟା । ପ୍ରାଭୁ ଇନିଃକେ ବୁଗିୟାଏ ଆତଃ  
 ଇନିଃ ପାପ୍ କାମିକାଦ୍ରେଦ, ଇନିଃକେ ଛାମା ଏମାଈୟାଏ ।  
 ୧୬ ମିହୁଡ୍ ଆତଃମିହୁଡ୍ନିୟାଃ ଆୟାରରେ ପାପ୍କାଦାଈଜ୍ ମେନ୍ତେ  
 ମାନାତିଜ୍ପେ ଆତଃ ମିହୁଡ୍ ଆତଃମିହୁଡ୍ଆଃ ବୁଗିୟା ନାଗେନ୍ତେ  
 ବିକ୍ରିପେ । ଧାର୍ମାନ୍ ହଡକଆଃ ବିକ୍ତିରେ ପୁରାଃ ପେଡେଃମେନା  
 ଆତଃ କାମି ରିକା ଦାଡ୍ଡିୟାତେୟାଃ ତାନାଃ । ୧୭ ଏଲିୟ ଆବୁଲେକା  
 ହଡ୍ ତାଇକେନାଏ । ଇନିଃ ଦାଆଃ ଆଲକାଏ ଗାମାଏକା ମେନ୍ତେ  
 ମିଦମନ୍ତେ ବିକ୍ତିକାଦ୍ ତାଇକେନା, ଆପିୟା ଆତଃ ଆଧା ବାରାଷ୍  
 ଅତେଦିଶ୍ମରେ ଦାଆଃ କାଏ ଗାମାକେଦା । ୧୮ ଇନିଃ ଆତଃମିସା  
 ବିକ୍ତିକେଦାଏ, ଆତଃ ସିମାଏତେ ଦାଆଃ ଗାମାକେଦାଏ, ଆତଃ  
 ଅତେରେ ହିତା ଜ ଅମନ୍ୟାନା ।

୧୯ ହେ ଆଇୟାଃ ହାଗା ମିଶିକ, ଆପେକଏତେ ଜେତାଏ ହରା  
 ଆଦେରେଦ, ଏଟାଃନିଃ ଇନିଃକେ ସାର୍ତି ହରାତେ ରୁହାଡ୍  
 ଆଉଈୟାଏ । ୨୦ ଙ୍ଡାଦ୍ ପାହାମେପେ, ଜେତାଏ ଆଦାକାନ୍  
 ହରାଏତେ ପାପି ହଡକେ ରୁହାଡ୍ ଆଉଈୟାଏ, ଇନିଃ ଏନ୍ ପାପି  
 ହଡରାଃ ଆମାକେ ଗନଏଃହେତେ ବାଞ୍ଚାଅୟା ଆତଃ ପୁରାଃ ପାପ୍କ  
 ଛାମା ହବାଅଃଆ ।

**ପାରମେଶ୍ଵାରଆଃ ଜୀନିଦ୍ ବାଚାନ୍**  
**The New Testament in the Munda language of India:**  
**ପାରମେଶ୍ଵାରଆଃ ଜୀନିଦ୍ ବାଚାନ୍**

copyright © 2020 The Word for the World International

Language: ମୁଞ୍ଜା (Muṅḍa) (Munda)

Contributor: The Word for the World International

**ପାରମେଶ୍ଵାରଆଃ ଜୀନିଦ୍ ବାଚାନ୍**  
**ନାଞ୍ଜା ନିୟମ୍ , 2020**

The New Testament in Munda Language

The Word for the World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-13

---

PDF generated using Haiola and XeLaTeX on 22 Feb 2024 from source files dated 14 Apr 2023

903abb6b-97c3-582d-9df8-a6a8f2fce6d6